

雙桂堂稿續編

雙桂堂稿續編卷十一

臨川紀大奎向宸著

姪曾孫紀咸祚校字

縣志名宦傳補

裴材宋嘉祐元年以尚書司門員外郎知撫州軍州事二年因城之東隅作擬峴臺會南豐記之謂君旣因其土俗而治以簡靜故得以休其暇日而寓其樂於此州人士女樂其安且治而又得遊觀之美亦將同其樂也

道童元高昌人自號石巖由中書舍人遷無錫州達魯花赤有威惠後官江西行省平章政事陳友諒陷江西道童

退保撫州嘆曰我爲大臣不能守城又不能死復何面目
見天下會追者至道童渡水迎戰死之諡忠烈 按道童

雖非撫州官然由江西退保撫州戰沒於此宜附錄之
陸琳號玉洲平湖人明嘉靖十八年由御史知撫州初琳
按蜀風烈甚著郡讐其名慮必有大創革比至郡循循然
與民休息一無更張務令僚屬得獻其忠百姓得輸其情
歲大饑六邑沟沟琳悉公廩平糶之繼貸諸富室鎮之以
安靜故鄰境多寇亂撫郡獨免民甚賴焉

顧需號橫山海鹽人明嘉靖二十六年由南京禮部郎中
知撫州以俗漸奢侈躬行儉約爲吏民先馭胥吏興臺不

少假借刑獄簿書必致其詳愼草雖數易而不以爲病率漏下數刻而不以爲勞雖冒不韙而不爲苟且阿徇之政君子謂其節儉正直有羔羊素絲之風焉

陳一貫字魯得福清人明嘉靖進士二十六年由杭州守被謫遷撫州同知以千金陂萬世之利屢築屢廢迺作石堤爲堅固不拔之計芟舍堤旁載離寒暑民甚德之未幾中浮言罷民咸以爲冤一貫泰然不少愠戚日與郡人陳九川眺靈谷遊仙巖九川以爲侯於此有若釋負嶮巖振羽寥廓者非所謂豪傑之士與

林垠號野橋元美曾孫明嘉靖三十一年由桂陽知州遷

撫州同知以向來勾稽徒事虛文口絕戶虛漫弗蠲除于是斷自成化天順以前諸有據可蠲者削籍以報凡銷部符省清勾者萬餘戶臺使嘉之行諸十二郡以爲式嘗兩握郡符一攝縣政振清敝蠹剖決壅滯修舉廢墜與會祖元美知郡時善政蓋無忝焉

潘梅號蘿江順德人明嘉靖中通判撫州至則屢謁象山康齋兩先生祠納交於陳九川與九川言每稱其鄉陳白沙不遠數千里擔簋裹糧問道於康齋先生之門今乃得至此以爲幸嘗因試諸生與論天人合一之學未幾以廉吏能臣登薦剡尋擢貳紹興惓惓於九川九川以陽明

先生倡道於浙其門人龍溪緒山今皆在因敘其師於陽
明友於龍溪緒山者以送之

田美字在中濮州人明正德六年任撫州推官推爲慎刑
之官然務稱名者少美獨殫心求盡其實撤羣蔽求民情
以明庶獄險頑獷悍芟夷蘊崇以信善類故臺使交薦甫
考績而被召命與釣譽倖進者異矣

李彬號質菴泰州人明嘉靖中以進士知臨川時境內姦
宄出沒寇賊芽蘖其閒彬夜寐夙興日精而月煉然未嘗
以暴怒峻法故示威嚴已而刑罰必當民心畏服姦宄屏
跡寇賊潛消甫歲餘治行大著遂以入覲去

高飛聲福建長樂人明末以撫州同知署府事黃道周督師邀與偕守 大兵下撫州遣家人懷印走謁唐王而已居守城破死之乾隆四十一年

欽定勝朝殉節諸臣錄採入 賜諡節愍

桂有燿石埭人明末任撫州訓導 大兵入城自經死乾隆四十一年

欽定勝朝殉節諸臣錄採入 賜諡節愍

任士理山東聊城貢生康熙五十三年知撫州實心任事嘗移建考院於府署西舊址光明宏敞士感其德然未嘗一語記其事越四年諸生請於督學沈翼機翼機謂士理

急公愛士能不自有其功足以徵其爲政之實賢於世之爲治務名者矣

劉永錫奉天鑲紅旗人乾隆三年知撫州勤民愛士凡民間種植畜牧一切宜忌每於勸農之時爲鄉父老諄諄訓勉訪會南豐故居建興魯書院今增祀尚賢祠

范廷楷山東聊城進士乾隆十七年知撫州慈祥愷弟愛士恤民甫一年去士民惓惓不忍捨今增祀尚賢祠

陳朗浙江平湖進士乾隆四十六年由刑部郎中知撫州政尚清簡讞獄必求其當教士必正其趨向修葺興魯書院建講堂作記示學者以學不可不講然不可徒事乎講

又以朱子陸子皆同乎我者非若異端之可闢蓋欲學者知所嚮往而亦足以見其爲治之有本矣

程元林廣西桂林人由明通榜乾隆三十五年知臨川縣勤於聽訟常至三更後或五更始退堂每問一案反覆詳愼必使民無冤抑案無畱滯在任六年民至今思之

秦沆號筠谷江蘇金匱監生初任新淦縣丞嘉慶十一年陞臨川知縣理冤雪枉愛民重士邑內公務如社學縣署橋梁育嬰堂普濟堂敦仁堂諸役無不竭力倡建而自奉布袍蔬食澹如也性嚴毅人不敢干以私尤知人善獎拔前後童試經賞識者多脫穎去邑舊喜迎賽士女紛雜前

剴切曉諭此風頓息十九年冬江南大祲壽州饑民百數十口至數百口不等由浙江歷廣信建昌至臨川境沆慮其在鄉村肆擾先出示捐廉買米城中設廠每口日給米八合錢十文旋雇船裝載差役護送出境前赴下游諭令速回春耕毋失農時饑民歡帖而去剔漕蠹懲訟師境內肅然輯臨川間見錄補舊志以後事後改名臨川續志二十五年以卓異擢南昌府同知去之日猶書畱別詩四章爲士民勗後遷永平知府致仕歸

龔元玠字琢山號畏齋南昌進士乾隆辛卯由銅仁知縣改撫州教授勤於訓課諸生童來見必細問所讀書及處

倫常中事並勸人依歐陽公限字法每日熟讀經書三百字無閒斷四年半可畢九經刻讀書法示人來學者日眾著有周禮及各經客難又嘗言八卦先後天皆出伏羲證以八卦字由後天次序所製如震字正二月雨水三月建辰故从雨从辰巽字四月建巳巳爲雙女从雨巳共朱鳥一名長離故五月卦从離坤字七月建申夏秋閒屬土故从土从申兌字八月卦从八首九足兌爲口舌以口字足之乾字从半九雨十巳亥陰陽之交數皆取雙以太陽日足之坎卦冬至水泉動水動則土欠取義也惟艮字始終之閒別有取義餘七字合後天次序極顯先天八卦亦用

後天始製之字故知其皆出伏羲也其解經獨得多類此
後歸家年八十餘猶日與學者講釋經義云

縣志忠義傳補

張恒元時人橫渠裔孫六世祖日中世居南城宋末通判興化軍起兵勤王隸督府麾下元將李恒襲文天祥日中奮力拒戰身中數十創死子惠避地臨川上官里元泰定四年恒任電白千戶與高州徭寇力戰死里人以日中死國難於前恒死國事於後皆橫渠講學之澤也立上官忠烈祠合祀之瑞州路錄事龔繼善作記

揭重熙字祝萬一字萬年號蒿菴性嚴正敏捷三歲能誦二十四孝詩悅母稍長讀書一目成誦登明崇禎丙子順天鄉試及明年會試皆以五經中式時稱異才初授福寧

知州迎父貞符公就養每日出堂事必先請於父入悉述以聞慮卒隸捕盜加以曲刑必察其肢體俱無傷卒隸乃免責凡重罪悉令其自伸辯窮心服始定案民間有一清如水愛如春之謠甲申之變同副總兵洪日升起兵勤王臨發呼子貞傳曰吾行矣汝代吾定省王父呼夫人楊曰汝今卽同寡婦子卽孤兒勿以我尚在爲念八月抵南都有蘭谿之捷求面陳兵事福王授吏部驗封主事居三月以艱歸

大清順治二年乙酉南京破江省亦入版籍重熙復招集鄉勇徐組綬萬民望王宏等起兵湖東會益藩兵起重熙

走謁請急臨省會則聲勢振王不果重熙因畱新集二千
餘人爲建昌助守獨行歸撫州檄組綬等速招募閏六月
撫州失守七月建昌又失重熙招九蓮洞兵迎永寧督其
軍戰撫建連復之建昌又被圍重熙提兵來援組綬民望
宏戰於潯灣而敗時唐王加重熙考功司員外兼兵科給
事中十月大兵至撫重熙飛騎抵建昌約鄭彩駐中路
相倚爲勢而彩不應十二月撫州復失守重熙趨福州請
兵再舉吏部主事王兆熊劾之丙戌三月陞謁與兆熊廷
辯兆熊悚懼四月復召對重熙以部將劉名奇王宏徐組
綬范某題授副總兵請忠孝廉節四條印唐王手加一大

字時兵事專委重熙永寧旣敗重熙復趨福州統諸將進克金谿復撫州有衆十餘萬捷聞授都察院右僉都御史代劉廣允巡撫湖東以諸將進止不協退保瀘溪授潘鳳參將帥偏師禦敵重熙擐甲督師與大兵戰於銅蒲隘師姑嶺及高田孔坊俱連勝八月大兵下福州重熙急令中營洪深率兵入鐵牛關趨光澤駐峽山遇苦雨食盡潘鳳迎戰死越數日聞唐王赴贛州倍道趨贛爲大兵掩擊師潰急收散卒親督洪深攻破撫州洪深戰死重熙復趨贛大兵追及三洞重熙據馬祖砦殺偵卒數十人斬二將月餘糧乏兵潰重熙三日夜餒行從小徑抵安東

金貴諸若令聯絡以待而身爲日者裝以覘虛實四年丁亥春會客有自省來者傳金聲桓王得仁有構變意欲從重熙求唐王勅印約九月二十五日舉事重熙令謀之信豐曹兌光兌光奉意指造豫國公建武侯兩勅印付來客賈省明年戊子正月金聲桓王得仁果以南昌叛幣車迎重熙入城爲重熙商入閩事重熙招閩將郭天才誘以勳爵三月天才部將守邵武郡城門期十六日以内兵應重熙密畫方略授將士以砲號許達貪功獨進砲早發城內兵有非郭屬者徑出衝擊兵大潰又聞大兵圍南昌重熙赴粵求援十月抵廣州見李成棟曰江西急矣須兼程

進救十一月抵肇慶備奏江省情形永明王慰勞泣下拜
重熙兵部尚書兼右副都御史總督江西賜尚方劍便宜
行事給智仁勇信嚴五鎮勅印然無餉可支兵可遣一人
徒手受命而往兵未及歸而南昌破沿途召募己丑正月
猝遇大兵戰於程鄉大敗監軍桂滋陣歿重熙身中三
矢僅免金王死其故將張自盛洪國玉等聞重熙奉新命
出湖東爭來歸兵大集駐寧都石城聞七年庚寅重熙以
張自盛駐閩赴其軍約廣信曹大鎬並進甫入閩界大
兵圍之數重重熙分部諸將戰數合佯北引大兵入伏
中前後夾擊大勝遂徇諸郡邑皆下之進至撫州八年辛

卯自盛掠邵武戰敗被執四月重熙乃率數十人赴大鎬
於百丈磔適大鎬還軍鉛山重熙至惟空營在眾就營炊
食大兵偵得率眾圍之射重熙中項執至崇安崇安將
曹天壽邑令殷應寅具車蓋迎重熙入城諭之降不應時
重熙不食者七日矣械送建寧獄重熙日呼高皇帝請死
作詩歌數百篇士紳多賄獄吏乞書重熙各爲書不辭有
故部將謝以和閒關走候入獄重熙以爪髮屬謝并獄中
歌詩付之一拱而入更無他語越數日昇至南街市口獄
吏啟下車重熙知之欣然整衣冠南向昂首受刃白氣逆
騰丈餘血碧地時十一月初三日丁丑也同時殉難者四

人一爲鄧貴臨川人一爲鄒鳳一爲朱國隆一爲陳嗣道
鄧貴鄒鳳重熙部將國隆嗣道皆閩人非素知聞重熙被
獲卽儒衣冠肩輿進沙城謂閹者曰吾往謁揭閣部閹者
導以赴鎮守二人語不遜鎮怒禁之別獄竟不屈死重熙
屍橫南街一晝夜明日戊寅義士楊紫生賂得之出城藏
雀啄山麓紫生自有傳初重熙族弟恢之隨重熙歷百戰
是役戰死百丈礫又族弟羽冲前爲福王閩浙總鎮亦戰
死百丈礫羽冲弟培赤爲漳泉總鎮戰死汀州重熙從姪
剛五倡義閩粵奮勇力戰歿於陣族姪欽繩亦隨重熙百
戰不撓糧盡被執獄中自縊死重熙從兄萬毅爲福王武

烈將軍與重熙同出兵勇於戰兵敗被執亦死獄中萬毅
兄萬邦在家聞重熙執嘆曰無能爲也觸檻死乾隆四十
一年 賜重熙諡忠烈入祀忠義祠兼祀鄉賢祠子貞傳
詳孝友

王士和金谿籍臨川人明末任延平知府唐正走汀州命
之居守城將陷從容正衣冠閉戶投繯死乾隆四十一年
賜諡節愍入祀忠義祠

譚聖言明直隸唐縣主簿崇禎末流寇破城被執不屈死
乾隆四十一年

欽定勝朝殉節諸臣入祀忠義祠

樂徽聲字君虞明天啓甲子舉人任山東利津知縣崇禎
壬午流寇圍城典史商同逃避曰當死守城安可偷生苟
免城破朝服北向哭拜賊至大罵不屈死妾胡氏亦同死
子邑庠生大薦被執大薦女團姑出語賊釋吾父當從汝
賊釋大薦去女抱柳樹不從賊斫其首死猶手抱樹並見
烈女

王春元號景湖世居臨川黃洲村其大父庠生路僑寓池
州遂居池春元以碩德見推明崇禎間舉鄉約長討究六
條敷陳切實閭里咸樂聽之甲申之變隨官屬聽遺詔卽
大慟踉蹌噴血歸遂絕粒勺水不飲數日聞南都信乃日

一食咿鳴涕泗不下咽如是經年乙酉五月南都被六月
大兵至池春元夜起作絕命詞取河魴子與砧同食是
夕有聲震於庭轟然若巨鐘翼日乃知其死其詩有挺胸
泣故主難聞杜宇聲之句又曰吾今願自死未報水土恩
子鳳翥字羽伯痛父以鄉約殉國難誓終身苦塊居一小
樓足不入市四十餘年太守聞其人欲禮見之不爲屈欲
旌其閭不受或以鄉耆舉曰必爾當以吾父之所爲死者
死耳太守以忠孝之後聽自便鳳翥每日咏歌嗚咽常以
砧置襟帶間至臨歿時尚未解屐熙乙亥病卒惟號父悲
慟無一語及他寢處尚如聖室里人私謚爲孝節先生春

元弟文元號昆湖嘗刲股療親病親歿廬墓不歸天啓二
年巡方御史易應昌訪於山中見其蓬首垢面悲哀骨立
爲請旌於朝春元有族弟名秉乾者起家孝廉同知長沙
府歸臨川起義兵戰死見宦業傳

縣志孝友傳補

鄒文遠居邑南鄉博溪明萬厯時人母黃氏多病家貧採
拾以養母病篤輒嘗糞審其甘苦一日糞轉甜滑惶怖甚
密禱神判股烹沸奉母食之遂痊孝養數載以壽終

傅合字子賢明天啓時人母病步禱華蓋山夢浮邱伯告
曰此處丹井泉可飲也汲歸果愈崇禎初流賊劫其父勤
叟去合聞之急奔寇營泣告曰吾父年老力衰不堪効用
某願以身代寇爲所感俱釋之未幾寇降帝問投誠之故
曰臨川縣有孝子在焉有孝子必有忠臣天下未可妄窺
也帝悅七年特加旌表贈合工科左給事中巡按江西監

察御史王萬象大書旌表孝子贈工科左給事中傅合之
里勒石北門外道左初勤叟好橘築園種樹及卒每橘黃
合抱樹號泣終身不食合生五子長朝翰居庸關總戎次
朝佐鴻臚寺署丞次朝佑自有傳次朝宸光祿寺少卿功
加太僕寺正卿次朝俊銅鼓營守備拜威遠將軍朝宸著
有虞溪詩餘合祀鄉賢祠

增訂舊志傳

羅光星居邑藤橋里明崇禎時人性至孝父病危篤醫治
罔效光星默禱割股和藥以進病遂痊本里進士河南巡
撫邱兆麟旌其門曰孝性鍾天

李枝美字譽佐號思劬居楊溪康熙丙辰父用吾疾臥牀

不起遍禱各寺廟疾彌篤枝美倉皇無措中夜割股以進
病愈得年八十有八

李燁字天立居楊溪性孝每自外歸必問父母飲食多寡
及動履狀康熙癸巳母陳氏病篤燁素知醫診其脈甚危
夜半焚香告天割股肉以進病頓愈至雍正癸卯卒父枝
葉後十五年卒

劉文達南鄉嶺上人幼失母事繼母黃氏極孝康熙中繼
母病半載文達朝夕視藥不稍怠病亟遂割股以進母卒
哀毀盡禮鄉里咸重之過其地者必曰此劉文達里也至
今猶然

鄧斐然居邑南鄉八十一都性孝乾隆中貿易貴州忽念母遽歸家省視至則母陳氏病篤斐然是夜割股以進其弟步雲亦孝每日嘗糞察病淺深母病竟愈人咸謂斐然兄弟孝心所感

左江祖農家子幼失怙每春秋祭祀必哭泣歲時追慕無稍閒母吳氏年五十四得痿痺疾寢處牀褥轉側需人江祖與妻周氏日夕侍奉十九年如一日皆可謂孝矣

張士耀字元發父母早喪事繼母余氏病篤刲股救之進士游藝爲之作傳

王方正父母歿各廬墓三年師歿亦如之孝廉李夢松諱

曰王生膽怯怯無比白日獨居常畏鬼父死棄家守墓旁
墓隔家中三十里青燐夜起松楸號王生知哭不知死春
漲漫山山路封蒼顏老父夜送米獵人逐蛇蛇入廬王生
護以短脚几山禽野鹿朝昏來千神萬靈依孝子臨川太
守巽齋朱名展停舟親叩荒山址學使來時力爲言不錄王
生奈何矣母死聞之更可傷一妻三子值年荒夜宿墓旁
朝賣卜一家閉戶吞糝糠五日不食小兒死阿娘忍哭坐
破牀王生三年不至家阿婦三年不出房孝子孝婦至此
難行路聞之亦斷腸吁嗟此禮古所傳秦漢以來乃不然
讀書偏欲外聖賢王生師死亦三年卽今兒長學種瓜王

生賣卜王洲前每到思親時當哭依然長日突無煙

何芳桂五十三都路墟村人家赤貧傭工以養父母必擇
鄰近處可朝夕定省者迨父母老頽起居櫛沐澣溺澣洗
皆躬自操持殷勤數十年如一日父母歿廬墓三年現年
六十三歲

已入志稿因其人現存
故未梓今附記於此

縣志尚義傳補

羅季騰居邑藤橋里明萬曆四年邑大饑季騰發穀振貸其鄉邱毛伯兆麟作饑年貸敘歌紀其事有貧併不計息亦不記姓氏償否聽其人居士渾無辭以此吾鄉戶父子免流離他鄉有饑戶吾鄉戶不饑等語見玉書庭集

劉鍾秀字文伯御史達從弟順治乙酉達挈家避兵豐城寓隱溪鍾秀從騎軍猝至達逸帥止其妻管氏不屈執氏子十三歲茂才就鼎鑊以撼之鍾秀旣匿免聞之悲憤趨起出謂帥曰若不過黃金美女舍嫂吾可立致也管氏得以其閒躍入深池死帥大怒槩鍾秀鍾秀罵極口遂殺之

解其體爲三投坑中達痛甚未逾月亦死鍾秀與陳孝逸
李君揚等十八人爲文章友平日懦弱似處子一旦剛勇
若此孝逸爲文慟之見癡山集

范惟中字元夫居七都洛石里明崇禎時諸生讀書好擊
劍膂力過人善搏虎常牧山中挾犢踰溪澗一躍而過家
居數十年甲申之變揭重熙起兵勤王惟中挾策相從運
六十觔鋼矛上陣如飛籌略悉中兵機重熙盡節後家屬
賴以保全事平斂跡歸里日與游東昇劉命清諸人詩酒
往來嘯歌一室嘗署聯云何事未曾爲到頭來無過穿衮
喫飯諸艱皆歷盡歸根處不如鑿井耕田

縣志儒林傳補

李本字伯宗元時人從學於吳草廬澄草廬歿就學者多
依李氏本與從弟棟講明濂洛之學所居有環翠亭君子
堂虞集皆爲之記集送李伯宗序言伯宗爲學取論語孟
子大學中庸集註章句句句而誦之字字而索之不敢有
閒也其於易詩書春秋禮記取先儒訓義以通之循環誦
讀率數月一周不以處家之難應事之雜而少廢焉棟父
季淵嘗三割股療母病輒愈郡人以孝稱之

改舊志

何輝字達鴻別號甌峰居邑南鄉九十八都古崇源八
歲能文比長力追古大家何義門焯王疇五思訓嘗序其

時文行世登雍正癸丑進士以知縣分發直隸歷署行唐
慶雲等縣補授平谷縣愛民如子遇會勘等案多直其事
不肯因勢要冤一小民遂爲時忌甫逾六十卽乞歸教授
山中來學者日眾以致知力行博古通經爲主尤邃於易
手批易經大全諸書不下數萬言所作動靜說數說五行
說太極附義等說約二卷多前人所未發嘗語學者易有
太極實實有太極不只是陰陽未分爲太極不只是陰陽
恰中爲太極又不只是陰含陽爲太極又不只是一事一
理爲太極這都是先儒拘煞道理去捉摸的話某只說運
動是太極天是太極地中無非天也易畫一奇是太極六

子震初是太極六十四卦七十二候復初是太極開端一箇貫首尾只一箇耳若以爲不然試看有天有日月以來有一息不運行否地生長收藏有一息不承天之氣否其所以分晝夜寒暑升降消長者則地塊形質之分限也又曰晝一奇以象陽故曰易有太極天行健也晝一偶以象陰則兩儀矣天爲太極終古行健無有息也日月天運也無有息也寒暑晝夜升降消長天運也無有息也又曰有天以內人謂之空寂之處皆天也無不運也地受其運而塊處焉所以區日月寒暑而東南西北之也所以半日月寒暑而晝夜春秋之也皆地朴之分限也又曰天之大人

猶有憾有形質故也。地者天之形質也。又曰地不自爲承天之爲爲萬物然猶拘於形質有偏全通塞之分不能無聖人之贊況人之有耳目口鼻手足之形質況人之形質有貫太極之心各累於其耳目口鼻手足之形質乎。又曰讀震卦知人陽動之道天之氣也。須震來虩虩謹獨慎動之至後乃笑言啞啞震驚百里不喪匕鬯何事不可爲乎。讀艮卦陽極而止屬地之質知人陰靜之道必艮其背不獲其身行其庭不見其人如是則動靜皆天運也。何有耳目口鼻手足形質之私欲乎。又曰復卦一陽來復天運也。非形質也。剝卦一陽極於上曰碩果不食天運也。仍非形

質也聖人於姤則欲繫于金梃於夫曰无號終有凶惡形

質之累陽也於巽欲其順陽於兌欲其說陽不欲形質之

違陽也

地不自爲以下三段志傳節去今仍錄存

以上門人洪儲厚齋所記其

他門人名有所記不盡錄又著增訂蘇批孟子七卷楚辭

評註八卷與時文俱行世又大學中庸論文衍義三卷批

點公穀盤庚檀弓樂記各一卷詩古文四卷藏於家乾隆

己卯卒年七十九

公爲大奎外祖卒時大奎方十四歲

王覺圖字京山別號我峰居邑南鄉百七都堆上里安貧

力學教人以求放心爲主每問學者必問胸中這些子若

何問何爲些子曰孟子幾希是也有之則生無之則死如

是數十年未嘗一日倦嘗作心齋賦以自志其辭曰惟道
之充實兮無美不備惟德之光輝兮無大可際緬維皇之
降衷兮乃聖神之所自此天命之靈府古今之正位無方
無體何思何慮故巷不陋顏之心牆不礙孔之視用則四
海皆春舍則棲遲衡泌謂之廣居安宅謂之春臺樂地名
百出而不拘號曰心齋何異予生也鄙坐美室而形穢處
大廈而身促爰閉戶以藏修養天君之沕穆困寒暑之十
易兮恍一陽之來復嗟平旦之幾希兮慮枯亡之反覆苟
非戒謹恐懼之握其根於隱微何由喜怒哀樂之通其事
於位育唯仁人能反求諸心思君子之必慎其獨丁卯戌

之仲春兮爲飢驅而索米以句讀爲人師雖猥鄙其焉避
路委折而穢積穴幽僻而深邃簷一線而天小窗一掬而
光釋非虎負嵎非兕野寄月夕花晨空尋詩酒之約岳嘲
隴誚爲爽疇昔之議顧影相憐躊躇滿志幸心齋之曠曠
吳主人以徜徉直衝千古橫徧八荒譬堯夫之一室寬
如天地類考亭之半畝鑑徹方塘包宇宙而非小超形智
而難量將窮神知化之不離乎此實主靜立極之永以爲
常是則從大體者之所以立其大致良知者之所以充其
良放之蓋彌於六合卷之則於密而退藏此心齋之大概
究不能道其精詳時有齋長出而亂曰太虛浩浩天載茫

茫觀子之賦抑何猖狂疇是內而非外孰內外之兩忘解
黃衣與狐裘貰酒於杏花之鄉其詩文多類此乾隆庚子
卒年八十一卒前數日與門人許載功書謂孟子書中兩
箇哀哉世上多少輓車挽他不轉汝宜速來一見也至則
極言此心此理之同不可一息亡且曰幾希二字今再爲
汝添一註脚將手空中畫一大圈曰包羅萬象此心千古
卒之日正襟端坐謂家人曰汝等環泣以死爲苦耶人苟
知天地之道此時與千古賢達一路風光至樂無量何苦
之有因朗吟曰企足踏白雲伸手扶蒼天不到九霄上安
知天地寬吟畢而逝有詩文稿藏於家

縣志文苑傳補

湯顯祖字若士生而有文在手年十四補邑弟子員隆慶
庚午舉於鄉萬厯五年丁丑會試張居正欲其子及第羅
海內名士以張之聞顯祖及沈懋學名命諸子延至顯祖
謝弗往懋學遂與居正子嗣修偕及第居正歿之明年癸
未顯祖始成進士與時宰張四維申時行之子爲同年二
相招致之又不往授南京太常博士就遷禮部主事將徵
爲吏部郎上書辭免十九年閏三月帝以彗星變嚴責言
官欺蔽竝停俸一年顯祖抗疏論劾政府二千餘言大略
謂陛下威福之柄潛爲輔臣申時行所移故言官向背之

情爲時行所得御史丁此呂首發科場欺蔽申時行教吏部尚書楊巍覆而去之御史萬國欽極論邊鎮欺蔽時行諷大學士許國擬而竄之二臣謫外使言官皆迴心斂氣時行得以滔然無橐諫之虞時行能欺蔽皇上獨能欺蔽天象乎吏科都給事中楊文舉奉詔理荒政徵賄鉅萬所過雞犬一空抵杭日宴西湖鬻獄市薦及其報命擢首諫垣矣至禮科都給事中胡汝寧除攻擊饒伸外一蝦蟇給事而已然則輔臣欺蔽故習無時而撤失此不治臣謂皇上可惜者四爵祿者皇上之雨露今乃爲私門蔓桃李皇上之爵祿可惜也羣臣風靡知受輔臣恩不知皇上恩豈

復有人品在其中皇上之人才可惜也輔臣不破法予人富貴不見爲恩皇上之法度可惜也陛下御天下二十年前十年之政張居正剛而多欲以羣私人囂然壞之後十年之政時行柔而多欲以羣私人靡然壞之皇上大有爲之時可惜也乞立斥文舉汝寧戒諭輔臣省愆悔過帝怒謫徐聞典史立貴生書院講學士習頓移稍遷遂昌知縣滅虎放囚誠信及物翕然稱循吏二十六年上計京師投劾歸又明年大計主者議黜之李維禎爲監司力爭不得竟奪官家居二十餘年事親柔聲怡色父母喪時顯祖已六十七歲明年以哀毀卒遺命以麻衣草屨斂顯祖意氣

慨慷平生以天下爲己任因執政所抑天下惜之祀鄉賢

祠訂改舊志傳并
節去後半幅

李茹旻字覆如仙客子居二永白鷺洲前人稱鷺洲先生
自幼厲學常中夜起讀書或遇夕不寐經史百家皆通貫
初工駢體詩賦尤善集唐中歲反約爲古文一準韓歐法
度舉康熙壬午鄉試以大臣薦教授 皇十六子癸巳成
進士與族弟紱以文名顯京師稱臨川二李時臨川亦有
南北李之稱以所居北鄉紱居南鄉也戊戌授內閣中書
以母憂歸雍正甲辰紱巡撫廣西請修廣西通志己酉郡
守羅復晉又請修府志所著二水樓集三十八卷行世周

易補註未刻藏於家卒年七十六

洪儲號厚齋年孫乾隆間邑廩生從何甌峰輝寧學詩古文俱澹泊醇古爲人靜穆寡言笑卒之日奉四書几案上焚香叩謝謂門人曰我一生所得賴此書也端坐而逝附舊

志洪年傳後

李夢松字梅偕號歉夫幼有夙慧詩古文詞皆信口立就人謂其天才非可及也弱冠時上朱郡尊書言撫州風俗及地方事宜約千言郡守深加採納少時落拓不羈後深自韜晦作靜說十三篇自娛乾隆己酉年五十六始登鄉薦嘗自訂時文初稿二稿共百數十首直探理道根源在

吐百家雖短幅具有崑崙河源之勢惜皆被人竊去無存
僅存歎夫詩文稿數卷年七十三卒

縣志處士傳補

劉象祖號敏吾明嘉靖時人家世敦尚行誼象祖尤剛正自持檢身之嚴雖閒居燕處衣冠言動不稍涉非禮嘗曰聖賢千言萬語無非教人爲善吾人讀書須識得其中一字一句皆爲日用行習之所不能外而篤志踐之雖不必功名顯赫著作昭然亦不失爲聖賢之徒矣每訓子弟務學謂若專事詩文不踐實行卽譽滿三都終爲吾家辱耳平居儉約終身儒素士林重之歿請祀鄉賢先是象祖大父廷範從父一瀾皆以德行仕績入祀鄉賢至象祖凡三人人以爲不愧象祖以子達貴贈監察御史

蕭邦泰字虞韶別號鳳谷邑東灘腰里郡庠生篤學潛修嗜古不懈性緘默或欲探其緒論則故與之飲乘醉叩之隨問隨答貫串經史辨論不窮然慎於擇交惟來學者皆不拒隨材誘掖多所成就嘗曰以類相從友道也擇友不可不嚴有教無類師道也師道不可不寬人服其論所著周易詳解大學要義中庸括義詩十五國世系考歷代名臣考等書乾隆某年卒年八十六

黃覺字剛若號區山邑庠生居縣東新店弱冠潛心理學事後母以孝聞壯歲失偶遂不再娶夙有文名乾隆甲子鄉試兩主司得覺卷俱嘆賞繼以議元不合副奪卷去覺

自是澹意進取益閉戶讀書自樂著有四書掠要詩說探
原區山夢草等書子金臺邑庠生著靈臺記填詞喻心學
要旨人多傳誦

祝惠字天授號沛亭九都仙臨里監生讀書識大體見義
必爲有田百餘畝每歲節穀數十石以與鄉鄰貧乏者凡
三十年計施穀二千餘石其後家稍落每屆歲暮猶以白
米簞笠給丐者又十三年好善之性至老不倦乾隆癸未
卒年七十六

宋世儒字凌雲號守拙殷坊里人少篤學家貧或斷炊旣
壯不遇遂客滇擁貲歸兄迪雲貧不自給推產與同居兄

子昏教悉如己下築守拙書屋里中貧不能學者致之塾
中族不能舉火者周之或負欠無償則焚其券里有通衢
數里皆土塍每風雨爲行者病悉砌以石捐穀百斛付族
鄰生息爲補修貲通醫鄉里病者或袖藥往視病愈謝弗
受與人聚處必談忠孝節義好善樂施之事亹亹不倦數
十年如一日蓋世儒讀書務大義故其行如此年六十餘
邑侯重其德行舉鄉飲賓乾隆乙卯卒年八十九
章大光字官臣號思齋性仁厚鄰有竄人竊其銀值大光
同惶恐吐實大光憫其窮以銀給之令作貲本謀生竄人
感泣悔悟大光終秘不言年七十二卒孫志成志貞少年

入泮曾孫樹萱弱冠中嘉慶己卯舉人蓋隱德之報
夏芳字敷榮號潔菴澹泊安貧作文幽潔郡守唐孝本深
契之嘗屢造其塾芳未嘗一語及私刻有潔菴文稿
黃作求字配京號定夫郡庠生安貧力學嘗斷炊有友人
適相訪惟見其閉戶讀書不減袁安高臥之致著有心易
二卷唾餘草二卷嘉慶亡已卒年七十三

曾祐字壽田號資亭童丁時已工四體字善詩古文家雖
貧見古書必購之歷任學使者郡守以下咸相器重乾隆
己酉以優貢赴廷試名公卿爭欲識其人相與汲引之祐
以母老力辭歸後僅登甲寅副榜嘉慶丙寅卒年五十八

士論惜之

謝家蘭字普倫號芬圃松湖邑庠生博通典籍藏書甚富至老寢食不懈生平重義輕財救危恤患鄉里貧儒受其惠者尤多著有閒中一得二柳瑣言銷夏叢談等編嘉慶二十年督學王鼎重其行誼贈之扁曰膠庠清品道光元年卒年八十一時同學山西廩生王步衢號而尊篤學敦行勤於誨人受業多名雋鼎贈之扁曰修品培英後舉恩貢又郡中邑庠邱志翀字儀徵作文力宗先正著有九苞堂集鳳軒時文稿鼎贈之扁曰膠庠善士時謂使者精於衡鑒云

紀大畢字雨民號勉齋監生居邑南鄉龍骨渡素有膽智
江西担匪者初名担子賊勾引各處無賴序齒結拜肆行
竊掠日久聚集多人出沒臨川崇仁宜黃諸縣常於龍骨
渡隔溪山谷間招集黨匪分一二三肩等序次設大宴會
命肩目等各執邊錢如剖符法半畱首匪處名邊錢會每
歲期會數次校其功過高下嚴立賞懲兵役莫敢向捕大
畢密訪渠魁伺其出入蹤跡陰爲之計時郡學博王定遠
與大畢交好乘閒爲言其事并陳可擒狀且言賊善走數
人探各處地方文武官信息甚捷故得早爲備若由省發
檄密辦出其不意即可擒矣不速除必爲大患嘉慶十年

夏四月定遠赴省適撫軍秦承恩詢定遠江西担匪著名已久我面奉

諭旨密飭嚴拏今聞在撫州地方郡諸紳豈無有知其巢穴能計擒者定遠悉以大畢言告撫軍以爲能卽發檄并委官帶兵役接應大畢乘夜持檄召集族鄰密授計畫次日侵晨率眾於匪所常聚處擒之是役也布置嚴密匪徒倉皇失措不能抗其逃逸者亦俱被獲得其首從肩目等三十五人匪曰我此地無秋毫犯爾胡害我示之檄曰此大憲奉

旨密辦者匪懼伏各官兵役皆至解省鞠實奏明悉寘之

法餘肩皆散自是担匪之害遂息定遠得議擢山西沁源令大畢不願議敘再三力辭撫軍遂奏明給扁大書永綏粉社四字獎之或問故曰此事爲地方計不欲邀功得敘或反致餘黨忿恨散者復集又適滋鄉里患惟心無私倖則宵小無所怨人服其識時大畢族昌桂字丹木者與其謀撫軍給扁功靖比閭四字並獎之大畢二十三年卒年六十七

余弟擒担匪事曩在蜀聞之記其大略見余前稿中茲修邑乘閱縣案乃得其詳觀其剖錢立會設各肩名色分布捷足各地方探文武官信息若此倘蔓延日眾其

爲患蓋有不可勝言者矣

縣志列女傳補

管氏豐城人。滴臨川御史劉達順治乙酉達挈家避兵豐城騎軍突至達逸氏被執不屈帥殺其子茂才脅之氏大罵達從弟鍾秀既匿免聞之亟挺身出謂帥曰卽舍彼黃金美女惟吾可立致也氏得乘閒跳入深池自溺死帥怒并殺鍾秀

烈節

花烈女南鄉百五都龍骨渡邑庠生花鳳彩女母姓潘故女名潘姑許字梅姓幼通詩書曉大義順治乙酉年十六遭兵亂族中被焚掠烈女有殊色爲騎兵所獲挾之馬上翻跳撲跌下馬騎又挾之屢挾屢下罵不絕口以手碎騎

面騎終不忍合狹上馬疾走烈女翻跳如前爪益迅罵益急騎知不可奪怒斷其舌擲之地上猶忿忿瞪目捲手作

撾騎狀騎遂碎共屍斷頭而去

烈女

游四姑山東參政游王廷曾孫女生員游軌女幼聰穎寡

言笑性不喜鉛印乳媼輩偶以時花簪之輒恚怒委諸地

讀孝經列女傳四書通大義并習醫書曰女子有疾於醫

人指下求生非以也許字上官里張翰年十六未歸而夫

歿計至父母秘不言數日始知夫已葬矣伏枕哀號數日

不入水漿父母愛惶詢所願曰願一至張郎墓耳許之乃

起食促輿徑去至墓大哭眼口鼻血涔涔出僕婢掖之歸

山懷中剪刀兩聲曰往張則生歸游死耳眾懼不敢逼遂
趨至張氏家甘家無少長皆哭進謁公姑畢擇複室一楹
奉夫木主朝暮食必泣奠撫族姪爲夫後數年翁歿撫子
復死家益窶依姑惟謹日夕紡績位甘旨雍正七年郡
守羅公復晉其門曰寒香傲雪乾隆十五年有司爲請
旌給建坊卹三十兩貞女以此銀修舅姑及夫墓族人
重其志爲建坊於閭楊錫紱李紱陶其慤曹秀先皆爲
作傳李紱游秋饒學曙錢載張所姚頤史貽謨鄧夢琴盧
文昭陳朗盧明楷萬廷蘭及當時知名士皆有詩清江楊
氏曰貞女同曾祖姊妹三十餘人半皆以節著游氏之門

何堅多節耶卒年八十三入祀節孝祠

貞女
訂舊志傳

許貞姑乳名姤玉崇仁大橋里邑庠生許廷魁孫女許字
邑南鄉古崇源何公喜幼習女師學通書義年十歲即自
名貞姑不欲人呼姤王也乾隆十六年貞姑年二十歲訂
昏期十二月適十一月公喜母黃與族人口角族按地毒
毆公喜疾往救母毆族傷數日死公喜下獄時議救母宜
得不抵貞姑孀母萬欲俟圻果得釋罪另擇期嫁女貞姑
泣曰夫救母獲罪雖死亦義也女已定期當往事舅姑若
違期畱女女有死許氏耳母知不可奪如期歸之慰事舅
姑俾無憂恐私忿不得獄中一慰其夫每中夜飲泣嘗密

語姑若夫罪不減婦死可代抵否姑曰不可十七年十二月得部議以總麻服制仍擬抵貞姑驚惶家人防守不懈是月二十二夜女伴睡熟貞姑自縊死比秋審公喜以可矜得減軍節烈

葉氏邑南鄉司徒里朱鵬千妻福建甌寧縣葉功顯女鵬千服賈甌寧功顯以女妻之時年十六歲嘉慶二年夫病氏拮据紡績供藥食服勞四載五年病篤扶持歸里氏度不可起一子方數歲以屬夫弟扶千曰幸爲汝兄善視此子我當從汝兄地下五月夫歿氏親爲殯殮家人防守甚殷氏密藏毒藥服之是夜死柩側年二十九今其子日光

能自立氏烈固天性扶千亦庶幾不負其嫂者矣

節烈

曾氏名寶秀邑南鄉外樊里曾和聲女許字黃源里應步明之子毓魁嘉慶庚辰九月毓魁未娶而歿女年十六卽奔哭或力阻之誓死必往拊棺號慟截髮成服旣葬勸之歸曰吾已拜舅姑當終身盡婦事之禮遂畱不去舅姑父母俱憐其幼數月後或以微言探之女曰所以不死者欲從容爲夫立繼苟有他言速我死耳家人愈敬重之然自是益慘急遂得病辛巳四月卒女之不易其志雖半載病卒與同日殉夫者無以異矣

貞女

李氏名奶秀邑南鄉博溪李君實女初許字一戶以他故

退婚君實歿其兄別議一戶已納采矣女不允願守貞以
老兄業農家貧女紡績自給以所餘并助其兄兄歿孑然
一身終始無悔言道光癸未現年六十七歲

貞女

黃氏博溪鄉新旭妻黃亦隆女順治四年二十五歲夫歿
家貧守節事姑撫子孝慈備至平日淡泊布素終身不出
戶庭雖至戚罕見其面康熙庚申卒年五十八一侍婢名
桂香感氏苦節朝夕隨侍不忍離氏欲遣嫁誓不往以至
終其身未有匹耦氏之貞潔能感其婢若此可謂至矣
藍氏百八都藍溪里陳世儀妻宜黃偕九都藍介成女夫
常客外氏勤事翁姑康熙癸巳姑藍氏病危氏每夜半無

人禱祝天地願損壽益姑一少大雪氏持刀跪雪中嚼雪以祝割左股奉姑食之愈無疾者八年辛丑姑復病禱祝如前割右股姑食之亦愈又五年雍正乙巳姑卒年七十六又五年庚戌翁誠一卒年八十一氏服勞終身里中稱爲孝婦壬子世儀客外歿時長子有榮十歲幼九歲紡績教讀郡守張忠震賜扁獎之曰至孝和丸有榮後爲里中老儒乾隆丁亥孝婦卒年八十

符氏邑南鄉八十二都郡庠生陳珏之妾建昌府南城縣符文光女珏年四十餘妻許氏側室吳氏均未生子勸珏再置妾遂娶氏年十八性柔順嫡與吳親愛之連舉子康

熙戊戌二十九歲夫歿符絕粒數日吳泣曰兩孤方穉我與若皆不可死符勉從之撫二子讀書有聲符年七十知縣何溥錫之扁曰節壽雙高乾隆壬辰卒年八十三道光二年曾孫國子監助教金臺聞於部得請旌前江西學政吳烜爲作雙節傳蓋吳之冰操實能相與共礪年逾三十不克並旌表之以雙節爲不愧焉嘗值鄰宅火將及吳取負欠各券語符曰夫君嘗欲焚券今此匣悉付之火以成其志符曰諾忽風返火息人謂礪節積善之感云李氏南鄉博溪鄒惠仁妻康熙丁酉歸惠仁壬寅姑病篤氏割股和藥以進病愈氏惟恐姑知囑同室秘勿言于是

一鄉人士欽其出於至性咸作詩歌以紀其事

王氏百五都趙長仁妻康熙辛酉二十八歲夫歿一子幼穉姑亦孀居多疾病氏扶持調養服勞備至撫孤成立苦節五十年姑得年八十四氏年七十七

劉氏周仲珍妻乾隆乙丑夫歿氏年二十四家貧守節或諷之曰吾義當撫孤已而一子竟殤夫兄席珍二子將以一爲之嗣席珍遽歿其長子亦亡或又諷之曰周氏不絕如綫吾妣弱多病胡可去撫妣子奠南如已子如章氏病羸氏維持調護數十載得年八十四奠南生二子皆教之成立氏之造於周大矣嘉慶癸亥卒年八十二

花氏上麓里監生王朝槐妻龍溪花兆謂幼女事孀姑極誠疾痛疴癢細微必知乾隆己卯姑病月餘每夕籲天求以身代比危篤割股和藥以進姑頓愈誠之所感如此知縣李夢璫書孝風巾幗扁獎之壬子卒年七十四

饒氏曾任田妻舉人饒文極孫女二十四歲夫歿夫仲弟相繼歿季弟遠出不知所往氏一子甫數歲氏以一身事舅姑撫弱子家極貧姑病兩載扶持廢寢處舅姑歿執三年喪克盡禮教子讀書必立志爲君子嘉慶丙辰卒年五十四邑人黃作求爲作節孝傳

紀氏字夢蘭龍溪處士紀經女幼讀列女傳至貞姜等事

輒沈思半日不語適宜黃軍山黃佩珍年二十四夫歿屢
覓死父母謂之曰汝舅姑年老我二人皆老斷不可死氏
篤孝乃已撫姪爲嗣母多病舅姑歿後歲歸侍母疾扶持
篤至嘉慶己未年六十四卒從弟大奎爲作節孝傳見雙
桂堂初稿

何氏龍溪紀永發妻何宏賢女二十八歲夫歿一子數歲
家甚貧氏勤苦操作奉事翁姑姑年近八十卒翁八十八
卒數十年服勞罔懈子稍長督之耕氏現年五十九歲
萬氏龍溪花瑞仁妻萬錚玉女年二十六守節家極貧孝
翁始撫孤子備歷艱苦現年五十歲

縣志雜記李鷺洲梅花詩一則

李覆如鷺洲先生梅花詩三十首其七云霜蕤隨意撥五
十五莖鬚可有犧觀象渾如馬負圖毫芒包大化一得始
愚夫漫侈書經世曾撿到此無初讀幾不知所謂及觀其
射覆詩一首云衡仲姪索射梅花鬚莖數中之因紀以詩
春風吹南枝香雪下平陸小阮指花鬚聊一戲射覆答以
五十五如響應聲速巧中一何奇數之駭相囑中央一巨
莖宛可太極目末銳與眾同其本大於穀眾莖環附之香
紛紛攢簇儼具一河圖陰陽此中伏錯綜迷方位參伍無
盈縮囊括鬼神機萬象歸一束迺知天地心盡見陽初復

太和保合中元氣渾含蓄當其發露初英華自完足得氣
此獨先故爾異凡族一物一乾坤此可觀化育何必覩龜
龍乃可興筮卜事奇詩亦奇雪花六出以北地爲最奇中
有一花心如鏡者見一六天地相包之意豈知梅花數五
中乃更具河圖之全鷺洲此詩化工係之矣

縣志雜記神童鄒慧事

鄒慧字雷英邑南鄉博溪人八歲能詩賦極敏捷里中每歲賽神將十歲下幼孩裝扮綵臺名兒郎架慧八歲時在裝扮內同廟眾問樂否笑曰我在架上看諸兒郎種種態狀戲作兒郎賦一篇朗誦與眾人聽約四百餘字眾皆絕倒次年乾隆丁酉考試入泮十七歲歿識與不識爲之悵歎

縣志雜記帥陞拾遺金事

有帥陞者自山左隨一官歸里歲終在菜園牆外路邊拾紙包一箇內洋錢四圓守候良久密置牆瓦內申刻聞鄰人母子詬詈哭泣問之其子自閩歸卽失銀者指令牆瓦內取去孔子曰見得思義孟子曰人皆有不忍人之心無惻隱之心非人也故人無聖凡事無大小仁義之良隨感而動君子於此可以觀性矣擴而充之火然泉達君子於此可以盡性矣